

共同經課 - 1

使徒行傳十六章十六節~三十四節

16 後來，阮去祈禱的所在。有一個女婢抵著阮，伊互卜卦的神上身，平素用卜卦互許個主人大趁錢。17 伊隨保羅及阮，叫講：「諸個人就是至高上帝的奴僕，用拯救的路傳互恁。」18 伊多多日按呢行，保羅真厭恨，越轉身給彼個神講：「我託耶穌基督的名，命令你對伊出去！」神即時出去。19 伊許個主人看見趁錢的向望已經失落，就掠保羅、西拉，拖in入街市去見有司官；閣解送到上司官講：20 「諸個人是猶太人，大攪擾咱的城，21 傳咱羅馬人所毋應該守毋應該行的規例。」22 眾人歸群起來攻擊in。上司官剝in的衫，命令用棍拍in；23 拍真多下，就關in落監，吩咐顧監的嚴謹顧守。24 顧監的受此號命令，就關in落內庭監，槌in的腳佇柴槌裡。25 若是半暝，保羅、西拉祈禱，吟詩謳嘍上帝，關佇監裡的人也注意啲聽。26 忽然，地大動，致到監的地基攏搖動，諸個門也連鞭攏開，眾人的刑具一盡落。27 顧監的人醒，看見監門開，拍算監囚攏已經逃走，就拔刀欲家己剖。28 若是保羅大聲叫講：「莫得家己傷害！阮攏佇遮。」29 顧監的人叫人抬火來，跳入去，愕愕悞佇保羅、西拉的面前；30 導in出來，講：「先生啊，我著怎樣做才會得著救？」31 應講：「著信主耶穌，你就得著救以及你的家。」32 就用主的道理講互伊及伊家內攏總的人聽。33 佇彼暝，彼時，顧監的人導in去，洗in的傷；伊及全家的人即時攏受洗禮。34 導in上伊的厝，備辦互in食。已經信上帝，就及通家大歡喜。

共同經課 - 2

詩篇九十七篇

1 耶和華做王！地著快樂！眾海嶼著歡喜！2 密雲及黑暗佇伊的四圍；義理及公平是伊寶座的地基。3 火行佇伊的面前，燒伊四圍的對敵，4 伊的閃爍照光世界，地看見就振動。5 佇耶和華的面前，就是全地的主的面前，諸個山消溶親像蠟。6 諸個天顯明伊的義；列邦看見伊的榮光。7 凡若服事雕刻的偶像、用虛假的神自誇者，攏著受見誚。恁諸個神啊，攏著敬拜伊。8 耶和華啊，因為你的判斷錫安聽見就歡喜；猶大的城亦攏快樂。9 因為耶和華——你是至高，搬(pôa")過全地；你是至尊，搬(pôa")過眾神明。10 疼耶和華的人，恁攏著怨恨歹；伊保護伊聖的百姓的生命，伊拯救in脫離歹人的手。11 光明是為著義人來備辦；歡喜是為著心正直的人來備辦。12 義人啊，恁著因為耶和華來歡喜，記念伊的聖名來謳嘍。

共同經課 - 3

啟示錄二十二章十二節~十四節，十六節~十七節，二十節~二十一節

12 「我緊緊到！報應在佇我，欲照逐人的所做來報伊。13 我是阿利法閣是奧美加；是頭一個，是路尾的；是起頭，是煞尾。」14 洗清in的衫的人有福氣！欲互in有權佇活命的樹，閣對諸個門入城。16 「我——耶穌已經差我的天使為著諸個教會，對恁證明諸個事。我是大衛的根頭，閣是伊的後裔。是光光的啟明星。」17 聖神及新娘攏講：「來！」聽見的人著講：「來！」嘴乾的人著來；意愛的人，通白白得著活命的水。20 干證諸個事的講：「著，我緊緊到！」阿們！主耶穌啊，你著來！21 願主耶穌的恩典及眾聖徒相及佇啲。阿們！

共同經課 - 4

約翰福音十七章二十節~二十六節

20 「我毋若為著諸個人求，亦為著對in的話來信我的人求，21 互in攏做一個。親像父，你惦佇我，我惦佇你，互in亦按呢惦佇咱，就互世間信你差我。22 你所互我的榮光，我已經互in，互in做一個，親像咱的做一個。23 我跼佇in，你跼佇我，互in會完全來做一個，互世間知你差我，亦知你疼in親像疼我一樣。24 父啊，你所互我的，我愛in佇我所佇啲的所在，亦及我相及佇遐，互in看見你所賞賜我的榮光；因為創造世間以前，你已經疼我。25 義的父啊，世間未識你，獨獨我有識你；諸個人亦識你有差我。26 我曾用你的名指示in，閣欲指示in，互你疼我的疼痛惦佇in，我亦惦佇in。」